

Selain daripada memayahkan orang-orang yang jauh untuk menemui *Chief* Kadi, yang sekalipun jam-jam kerjanya tetap di pejabatnya maka hal ini tidak berapa sangat terjadi. Banyak akibat-akibat lagi yang boleh berlaku bahkan orang-orang Islam akan menyangka bahawa mengadakan rang undang-undang memberi kuasa *Chief* Kadi sahaja untuk menikahkan orang-orang yang telah ada mempunyai isteri adalah sengaja untuk mengaitkan orang-orang Islam di dalam undang-undang kerajaan yang menegah kepada beristeri lebih daripada satu ke atas lain-lain orang yang bukan Islam sedang faedah daripada undang-undang menguasai *Chief* Kadi itu hanya bakal banyak menimbulkan ketidak puasannya hati daripada manfaat yang didapati padanya.

Di dalam hal ini yang sangat didukacitakan bahawa nama baik Jam'iyah dibawa-bawa sebagai sandaran bahawa perkara ini telah pun dikemukakan kepadanya.

Di dalam hal yang lain-lain, tentang kuasa Mahkamah Shar'iyah yang dikemukakan di situ kita berpendapat sudah pada tempatnya kerana tidak ada ertinya sesebuah mahkamah kalau tidak ada kekuasaan padanya.

Kedudukan Perempuan Sesudah Memeluk Agama Islam

Di dalam rang undang-undang yang dikemukakan dalam Dewan Majlis Mesyuarat Undangan telah dikemukakan suatu rang undang-undang mengenai seorang isteri, seorang yang bukan Islam memeluk agama Islam tidak boleh dikahwinkan dengan orang-orang Islam. Bunyi rang undang-undang yang dikemukakan yang termasuk di dalam bahagian 7 ayat (1) maksudnya berbunyi demikian:

“Tidak boleh dilaksanakan nikah di bawah undang-undang ini, kalau wanita yang hendak dinikahkan itu telah kahwin di bawah sesuatu peraturan undang-undang agama, adat atau istiadat yang telah lazim dipakai kepada seseorang yang lain, iaitu lain dari pihak yang hendak dinikahkan itu.”

Kerana perkara ini masih di dalam perhatian jawatankuasa yang dilantik untuk menerima pendapat-pendapat mereka, maka kita suka mengemukakan perhatian agama Islam tentang soal ini.

Menurut hukum Islam (sebagaimana yang dihuraikan di dalam kitab al-Fiqh 'alā al-Madhāhib al-Arba'ah), bahawa kalau dua orang suami isteri yang bukan Islam memeluk agama Islam maka mereka tidak payah dinikahkan semula (kerana nikah mereka yang asal itu sah)

Kalau pula si suami sahaja memeluk Islam sedang kadi berkewajipan mengajak suaminya memeluk Islam. Kalau si suami itu enggan hendaklah diajak sekali lagi – sampai tiga kali. Kalau juga ia enggan maka kadi hendaklah memisahkan keduanya (kerana perempuan Islam tidak halal bagi suami yang bukan Islam – dengan dalil Quran ayat yang kesepuluh, Surah al-Mumtahanah).

Kalau pula si suami sahaja memeluk Islam sedang si isteri tidak, maka kadi dikehendaki menyiasat kalau si isteri berasal kafir *Kitābiyy* maka dia tidak payah dipisahkan (kerana perempuan kafir *Kitābiyy* - Yahudi atau Nasrani- dihalalkan menjadi isteri orang Islam dengan tidak payah menukar agamanya, dengan syarat-syaratnya yang tertentu). Kalau pula si isteri itu berasal kafir *Mushrik* (bukan kafir *Kitābiyy*) maka kadi berkewajipan mengajaknya memeluk Islam. Kalau ia enggan juga maka kadi berkewajipan menceraikan keduanya (kerana perempuan *Mushrik* tidak halal dan tidak sah diperisterikan oleh lelaki Islam).

Jelasnya, apabila seorang isteri yang bukan Islam meninggalkan suaminya (yang bukan Islam) lalu ia memeluk Islam maka dengan Islamnya itu ia telah terputus perhubungannya


dengan suaminya yang bukan Islam dan bebaslah ia bersuamikan seorang Muslim yang dipersetujuinya.

Begitu juga apabila seorang suami yang bukan Islam memeluk Islam maka dengan Islamnya itu terputuslah perhubungannya dengan isterinya yang bukan Islam, dan bebaslah ia beristerikan seorang perempuan Islam yang dipilihnya.

Di dalam Surah al-Mumtahanah, ayat 10, ada dinyatakan apabila perempuan-perempuan (yang pada mulanya bukan Islam kemudian memeluk Islam) dan datang mendapatkan orang-orang Islam maka hendaklah disiasat dan kalau didapati mereka telah memeluk Islam

dengan sebenar-benarnya maka mereka hendaklah diberi perlindungan dan jangan sekali-kali dikembalikan kepada suami-suami mereka yang bukan Islam, kerana mereka tidak halal bagi suami-suami mereka (yang bukan Islam itu) dan suami-suami mereka pula tidak halal bagi mereka (perempuan-perempuan yang telah memeluk Islam itu).

Dengan keterangan-keterangan yang kita bawa di atas ini semoga perkara ini mendapat perhatian. Jelas dengan terangnya bahawa undang-undang yang dikemukakan itu bertentangan dengan ajaran-ajaran agama Islam.



Pelajar-pelajar Madrasah 'Arabiyah Bukit Bakti Kluang, Johor bergambar ramai dengan saudara Sanusi Ibrahim yang sedang melanjutkan pelajarannya di Kolej Islam Klang.

Duduk dari kiri: Haji Abdul Jalal, Sanusi dan Umar Ihsan: Berdiri dari kiri Abdul Malik

Yusuf, Khairul Anwar, Masuri dan Mermin- kiriman Hajbima al-Mawāri